

36. randi gratia, nedum propter orbem terrarum. Occisis
 Dhritarâshtridis quaenam laetitia nobis siet, o mortalium vo-
 tis expetite? Scelere sane imbueremur caesis istis praedoni-
 37. bus. Quapropter nos non decet cadere Dhritarâshtridas
 cum gentilibus suis. Quomodo tandem cognatis caesis fortu-
 38. nati simus, o Krishna? Etiam si isti, quibus mens sana li-
 bidine excutitur, non vident stirpium excidio admissum nefas,
 39. et in amicos saeviendi delictum: quomodo nobis non foret
 statuendum refugere hoc scelus, *nobis, inquam*, stirpium
 excidio admissum nefas praevidentibus, o mortalium votis ex-
 40. petite? Stirpium excidio delentur sacra gentilitia perennia;
 41. religione deleta per omnem stirpem gliscit impietas; im-
 pietate gliscente, Krishna, corrumpuntur feminae nobiles;
 42. feminis corruptis, Vrishnida, existit ordinum colluvies; col-
 luvies ordinum infernis mancipat stirpis parricidas ipsamque
 stirpem: nimirum praecipitant e superis horum maiores, libo-
 43. rum ac libationum solemnibus privati. Delictis parricidarum
 stirpis hisce, ordinum colluviem invehentibus, evertuntur fa-
 44. miliarum sacra et sacra gentilitia perpetua; eversis sacris
 gentilitiis viventium hominum, o mortalium votis expetite,
 apud inferos utique domicilium. Sic declaratum audi-
 45. mus. Eheu! quantum piaculum committere decrevimus,
 quod imperandi dulcedine allekti, cognatos cadere parati su-
 46. mus! Quin si me haud renitentem, inermem, tela manibus
 vibrantes Dhritarâshtridae necaverint, melius mecum actum
 foret.

SANJAYAS loquitur:

47. Sic loquutus Arjunas in acie, in currus sedili consedit,
 animo moestitia conturbato.